

IPARIACANARIGUETI PAAVORO ITIONCAQUENERI

TIMOTEO

Antsatantaquemparoca

Ocatica iroguenti antsatantaquemparoca paperi iroquetica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipaqi paperiqui (Ya. 7.57–8.1; 9.1-31; 13.1–28.31), aisa itioncacotaqueri Timoteo paperiqui Yantajiguica 16.1-3; 17.13-16; 18.5; 19.22; 20.4. Tequeratagueti intionqueroji Paavoro ocatica paperi itioncacaanquero otsipapae 10 paperipae choocajianquitsica paperiqui icantajitica *Tsavetacoquerica Jesoquirishito*. Iroaqueragueti iteroncaqueroqueti Paavoro ocatica paperi itioncacaantaqueneri Tito, coajica itioncacaantaquero mavitetapojatsica paperi itioncacaantaquenerica Timoteo. Itioncacaantaquero ocatica paperi ajagantsiniqui 63, ichoocaquegueti quepatsiqui icantajitica Maseronia.

Itioncacaantaqueneri Timoteo acaniqui intampishishirentacaaqueriniji (1.18-19; 4.1-16; 6.11-21), aisa cameetsaniji incantaqueri Timoteo incamantajiaqueri Epesoquitica aato itsatacaantajajiro caarica iroomajatatsica (1.3-11; 6.3-10), aisa intsatacaajiaqueri quero incojiaquempani jivajiguirica quemisantajiaatsica aisa amijiguirica (3.1-16; 5.1–6.2), aisa intsatacaajiaqueri quero incojiaquempani intsariventajiaquempani Aapani Irioshi (2.1-15).

1 ¹Naroguenti Paavoro itigarancane Jesoquirishito, iriguentiquea tigarancaquena Aapani Irioshi Shetacoji-acajica, aisa iriguentiquea tigarancaquenaquea Jesoquirishito aguujajavajeca aventajiaquempaca, irooquea oguishine-jajajajica. ²Imaica nontioncaquempi, irijani Timoteo. Nirijanintamajata-quempi, naroguentitari tsarorentacaa-quempica. Noninquequea incavintsajamajataquempi Aapani Irioshi aisa Amajirote Quirishito Jesoshi, noninque impintsatacomajataquempi, inchoocata-caaquempi cameetsa aatonijite pishoshoguitetajatsi.

Inchiquiojitaja yamatavijajiguimpitsija amataajatsica

³⁻⁴Coramaniquea noanaquegueti Maseroniaqui nocantanaquempiquea picocani pinchoocaque Epesoqui. Imaicaquea noncantsitajempiquea aisa pincoquempanija pinchoocaque oraniqui, choocatarite tsatacaantajigui-roca otsipapae teeca irooquea Quenque-tsatsarensimajaca, manatarite isavica-ventajiaqueroquea iquenquejajiguica paesatinipaequitica, yapatsajavantacoji-aqueroquea ipajiguetaqueti choviquijia-naquerica ariquee itsavetacojiaqueri-

quea. Manatarite isavicaventajiaquero-
quea intati. ¿Querocampaquea
incojiaqueroniquea? Irootaquetarite
oquenancacaca icatsimatavacaantantaji-
acaca. Teetarite irooquea inintaguetica
Aapani Irioshi. Iroguenti inintaguetica-
quea iriatimpa manaqueate antsaroven-
tamajataquempariquea Jesoquirishito,
aisa ancomajamajiaquempaquea.
Imaicaquea, aviatimpa Timoteo, pincan-
tajiakerija irovashiantajianaqueroquea
oratica itsatacaantaguishejiaquea.
⁵Nonintaquetari pincomajamajiana-
quempaquea aatonijite ochoocati-
taaca oguipashiventajiaquempineca.
Aisa pintsariventamajiaquempariquea
Aapani Irioshi cameetsanjite pagaveja-
jiaquenijite pimpintsatavacaamajajiana-
jempanijite. ⁶Choocajiaquea iconoaga-
ranca manaqueate icantashitajiaacar-
quea itsatacaantajiguica. Teequea
ariquea inquempējiajiquea aatimpajia
atsatacaantajiguirogueti. Iroguentiquea
iquenquetsatashijiaquea intati.

⁷Inintajiavecaquea intsatacaantajiaque-
romequea igantacaantane Aapani Irioshi
itioncacotanaquea Moishishini
quempeca arimajaca itsamajaquero,
cotanquitsiquea teequea intsatimajigue-
roji taaca ocantacoque manaquea
iquenquetsatocotashicaro intati.

⁸Aatimpajia atsajiaquequea maasano
igantacaantane Aapani Irioshi iroguenti
caavijica oganejencavaeca, cotanquitsi
mana inintajiti intsajite queri icantacaa-
quea aatoniji icomijitaro. ⁹Atsamajajia-
queroquea teequea iriojia incantacajai-
gejei comajamajajianquitsica, iriguenti-
quea icantacaaquea teeca inquemisan-
tajigueji iriguentijia aisa pigatsatantajia-
tsica. Aisa iriguentiquea icantacaaquea
caarica tsaroacagari Aapani Irioshi,
iriguentijia aisa covaeguishevaetaroca
coguisherentsipae, iriguentijia aisa teeca
intsariventajiguempariji Aapani Irioshi,

iriguentijia aisa metojajiguirica iriri aisa
iriniro, iriguentijia aisa maasano
metojantajatsica. ¹⁰Aisa iriguentiquea
icantacaaquea oashijiguiroca manqui-
garentsi, aisa manquigarentsijia
oashijiguirica shirampari. Iriguentiquea
icantacaaquea cantatsajiguirica
irapishirampariteni iquempetacaacari
manquigarentsi, iriguentijia aisa
aguirica caquite irojecantajiaqueri,
iriguentijia aisa tsojeajiatjsica, iriguen-
tijia aisa cantashijiatjsica: “Yamenaque-
naqueate Aapani Irioshi tee nontsoje-
guempaji”, cotanquitsiquea itsojeajia-
quea. Aisa iriguentijia icantacaaque
maasano peacagaroca taaca opajitapae
ocantimentantaquea Quenquetsatsaren-
tsimajaca ¹¹tsavetacoquerica Aapani
Irioshi quero icocani imeshiantigueti.
Iroguentiquea caaviji oshinetacaanta.
Irooquea itigaranquimenquenaquea
Aapani Irioshi nontsavetantaguiteroni.
Iriatimpa iriguentica caavijica yogane-
jencavaeca.

**Paavoro ishinevencariquea Aapani Irioshi
yamenaqueriquea iriguenti caaviji
ipintsatocovaecari**

¹²Noshineventacariquea agavejaca-
quenaca, iriraquea Quirishito Jesoshi,
Amajirote, nocanqueriquea: “Arioteesa”,
yamenaquenatari nocoguitani noguija-
majatanaqueri, inintacaantaquenaca
nantavaetaqueneri. ¹³Coramaniquea
caaviji nocantaguishtacovecari, aisa
nocatsimamajajiavecariquea tsaroven-
tajarica natsipetacajiacari, cotanquitsi-
quea ipintsatocovaequenaquea Aapani
Irioshi, yamenaquenaquea noquejeta-
queroqueti imaica teequea nontsateji,
teetarite nontsariventavetempariji
Quirishito. ¹⁴Cotanquitsiquea coajica-
quea icavintsajamajataquenaquea
Amajirote itsariventacaquena, aisa
yagavejacaquenaquea nompintsatanta-

majaquemparica nonquempejiaquem-
pari maasano tsaromentajigarica
Quirishito Jesoshi.

¹⁵Ocatiquea ocatica noncanquem-
pica imaica iroguentiquea arimajaca,
cameetsaquea paamajajiavaqueroja:
iroguentiquea icoraquetashitaquiti
Quirishito Jesoshi irimeshijiaqueri
covaeguishedatsica. Ariquee iquempe-
ta-
caaqueaquea naatimpa nanaavecaquea
nocovaeguishedmajavetaca. ¹⁶Cotanqui-
tsiquea yamenaquenagueti Aapani
Irioshi noquejetaqueroqueti imaica,
ipintsatocovaequenaquea cameetsanijite
iramenajitaquenanjite icocaniquea
yatsipetacomajaquenaquea Jesoquiri-
shito teequea incatsimatimatenaji.
Iroompa iramenajiaqueroqueti
oshequini caquinteja incantajiaque:
“Iroosacanic impintsatacojiaquenashi-
atsi naatimpajia aisa.” Iroompaquea
intsaromentajianaquemparigueti
Jesoquirishito incoguitempaniquea
inchoocaguiteni. ¹⁷Jaamejate
ancoquempaniquea ashineventajia-
quempari Aapani Irioshi, ancantajia-
queri: “Caaviji poganejencamajata.”
Iriotaquetari Majirontamajatsica
irimajirontaguitempani, icocaniquea
ichoocati, teequea inconijateji,
aparoquea icocani iriatimpa Irioshima-
jaque. Ari oncoquempa.

Itsatacamajaqueri Timoteo

¹⁸Irijani Timoteo, ocatica nocaman-
quempica oquejetaqueroquea itsataco-
tsitaquemtica tsavetantajatsica corama-
niqui. Nocanquempeiquea cameetsanijite
pogujatacotaqueroqueti pinquejeta-
quempari coareta yashimirintagueti
itampishiventaquero icanquerica
imajironcaca. ¹⁹Pincoquempaniquea

paventamajatanaquempari Amajirote,
pintsaromentamajatanaquempari,
pincomajamajaquempaquea aatonijji
ochoocati chagashirentapojaquempi-
neca. Iconoagarantajiacaquea itsaveca-
roquea covaeguisheveaca taaca
opajitapae, cotanquitsiquea arimpaquea
ipanacaro, iroompa yovashiantajiana-
queroquea itsaromentajiavecarigueti
ipomatsatantajiacaroca. ²⁰Ariquee
iquejijianaqueroquea Imeneo aisa
Arijantero. Irootaquequea nocantanta-
caca cameetsaquea irantsipetacaagui-
temparini Satanashi^a intsajiaquenijite
aatoquea icantaguishedacotiritsi Aapani
Irioshi.

Quero incoqueroni iramanajiterigueti Aapani Irioshi

2 ¹Iroquetiquea noninquequea
noncantaquempiquea pamanaco-
ventajiaqueri maasano caquinteja
pincantajiaqueri Aapani Irioshi
impintsatacojiaquempari, aisa pincanta-
coventajiaqueri: “Arioteesa.” ²Pamana-
coventajiaqueriquea majirontajatsica
aisa iguejemajirojiate, jivajatsica,
maasano, anchoocajiaquenijite
cameetsa aatonijite ochoocati taaca
ashoshomentajiaquempacca, manaqueate
asavicaventamajaqueroquea
maasanopae inintaguetica Aapani
Irioshi, ancomajamajiaquempa.
³Cameetsavaequequea anquempejiaque-
roqueti imaica amanajiaqueriquea
Aapani Irioshi Meshiantajitsica,
irootaquequea ishinevantaca iriatimpa,
⁴irooriji ininque irimeshijiaqueriquea
maasano, aisa ininque intsamajajiaque-
roquea Quenquetsatsarentsimajaca.
⁵Chooaqueate aparo Irioshimajaca.
Aisa chooca aparo cantacoventajiguirica

a 1.20 Pamenero 1 Co. 5.5, 13. Icanqueri aatonijite itsipajajari tsaromentajigarica
icapiocajiaqueti cameetsanijite irantsipetacaaguitempariniquea Satanashi.

caquinte aatonijite icatsimajiguiritsi Aapani Irioshi, iriotaquequea Jesoquirishito caquintetatsica. ⁶Iriatimpa ipanacaroquea inchiqiuojitaquea imetojaventajiaqueri maasano aatonijite yashintajiajari ampatsini, iriguentiquea ashintajiajempari Aapani Irioshi. Iroompaquea aapojacaguetei savincaguiteri inintantacaca Aapani Irioshi intsajitaqueronijite teeca intsajivetemparoji, itigarancajiaqueriquea itigarancaneja intsatacaajiaqueriquea maasano. ⁷Jeroquea ipeacaanquenaca itigarancane camantantanquitsineca, icanquenaquea nontsatacaajiaqueri maasano teeca irijorijoigueti queroquea icotani Aapani Irioshi imeshiantiguetei. Arimajaca nocanqueca, teequea nontsojeguempaji.

⁸Imaicaquea noninque querocaguetei ichoocajiaqueni shiramparijia iramanajiaqueriquea Aapani Irioshi, irancojempeventanaqueri, cotanquitsiquea incomajatimenquempari, aatoquea icatsimashi-renti, pinquenquetsatavacaquempaguetei aatoquea pipigapigatavacaaca. ⁹Aisa noninquequea manquigarentsijia netsanaqueate onquitsaajiaquempaja, aatoquea onintajigui osemajiaque-queate. Aisa aatoquea iroguentiquea osavicaventajiaquequea ampitapitaa-queeroquea omae. Aisa aatoquea caavijiquea oshineventajiaquemparoquea nenquetsiqui, ooro, quitsaarentsipaie aisa taaca opajitapae vegaramajata-sica. ¹⁰Iroguentiquea osavicaventajia-que oncavintsajantajiaquequea. Irootarite ininque Aapani Irioshi onquempejiaquempaquea imaica manquigarentsijia cantajia-tsica otsarorentajiacari. ¹¹Oraquea manquigarentsijia onquemisantamajiaque-quea itsatacajaiqueroca ontaniqui tsovironaqui qui icapiciopapinijitaguetei, omativicaquempaja. ¹²Teequea noshinete-roji ontsatacaantajiaquequea iroatim-

pajia icapiciopapinijitaguetei. Aisa teequea oncameetsateji anaimananaqueriquea shirampari, manaquea omativica-queempa. ¹³Iriquetitarite ipeacaaca-queate Aapani Irioshi Araini, iroompa-quea iquejetacaitsitaroqueate Evani. ¹⁴Teequea irio Araini iramatavije ampatsini. Iroguentiquea icoraquetashi-taque Evani yamatavijitsitaroquea ocovaeguishetantacaca. ¹⁵Irooquea icantantacaroca Aapani Irioshi antsipe-vaequempa irijanintaquempaguetei, cotanquitsi incavintsajacoqueroquea maasano manquigarentsijia ariguetei oncoquempani avenquempari, aisa ompintsatocotanguempaja aisa onquen-quejamajajiaquero quero oncoquempani oncomajamajiaquempaguetei.

**Quero incojiaquempani
quempoguijajiguirica tsarorentajiacarica
Aapani Irioshi**

3 ¹Arimajacaquea noncantajiaquem-pica: choocaguetei nintanquitsineca impeaquempaquea quempoguijajigui-rica tsarorentajiacarica Aapani Irioshi, cameetsavaeque. ²Cotanquitsiquea irira quempoguijajiguirica tsarorentajiacarica incoquempanijate incomajamaja-quempajate aatonijite ochoocatitsi taampate incantimentajiaquerica, manaquea iramenajitaqueriquea icomajamajaca, aisa irimanquigatimata-quempaquea aparo manquigarentsi. Aatojate ishinquitsi, intsamajaque inquenquejamajaque, irinetsanamaja-queempa, cameetsa iraaajiaqueriquea iroguisavisaviitavaqueriquea arejetimo-jiacarica, intsamajaque intsatacaan-taque. ³Aatoquea ishinquiguitani, aatoquea yaashitantatsi, manaquea incavintsajantaquequea, iroguishinejan-tanaje, aisa aatoquea ishineventaritsi imentaquipae incaraquisequivaqueri. ⁴Intsamajaquequea irinetsanajiaqueri-

quea choocatimojiaquerica, aisa intsatacaajiaqueriquea irijanijiate inquemisantamajajiaqueriquea aatoquea ipigatsataritsi. ⁵Quericaca teeca intsateji irinetsanaqueri choocatimojiaquerica, çarimpate iragavejaque irinetsanjiaqueri maasano tsaromentajatsica inquempoguijajiaquerigueti? Aatotarite yagavejitsi. ⁶Iraquea iriaqueraca tsaromentatsica teequeate oncameetsateji impeaquempaquea quempoguijajiguirica tsaromentajatsica, isemetitsi, iquempetaritsi ampatsini isemetaquegueti jero icatsimatantacarica Aapani Irioshi. ⁷Iraquea quempoguijajiguirica tsaromentajatsica iintsijate incomajamajatempaja cameetsanijite iramenajiaquerinijite teeca intsaromentajiguempariji Aapani Irioshi manaquea icomajamajataca. Oraquea aatoguetei icomajamajataca, iroguenti incantaguishetacojiaqueri maasano, iroompaquea iragavejaqueri ampatsini manaquea incovaegui-shetacaamajataquempani.

**Quero incojiaquempani
amitacopinijiguirica tsaromentajatsica**

⁸Ariqueate inquejiaquempaquea amitacopinijiguirica irapitsaromentarijiate, incoquempanijate incomajamajajiaquempaquea, aisa irinetsanamajajiaqueroquea icanqueca. Aatoquea ishinquiguitani, aisa aatoquea yamatavijiguiritsi igonorija iraitsijiaqueriquea imentaquitsitepae intati. ⁹Manaqueate incomajamajaquempajate intsaquenijitee anejeroci yantaqueca, aisa intsatacaantamajaqueeroja iroaqueraro yonigaimojiacajica Aapani Irioshi teeca intsajivetemparoji coramani. ¹⁰Iroqueti-quea iramenamajajitaqueri arimajacaca icomajamajaca, iroompaquea iramenajiaqueriguetei itampaticamajataqueroquea ipeacaaguecaca maasanopae, irooquea iintsijate impeaquempaqueate

amitacopinijiguirica irapitsaromentarijiate. ¹¹Ariqueate onquempajiaquempaquea manquigarentsijia oncomajamajajiaquempaquea, aisa onetsanamajajiaquero ocanqueca, aatoquea ocantashijia intati, aatojate oshinquitatsi, aisa ontampishitashijiaqueroquea maasanopae covaeugisherentsipae. ¹²Iraquea amitacopinijiguirica irapitsaromentarijiate iramanquigatimataquempacea aparo manquigarentsi, aisa intsaque irinetsanamajajiaqueriquea irijanijiate aisa maasano choocatimojiaquerica. ¹³Intampaticamajataquerogeti yamitantaqueguetei, irishineventamajajianaquempani irapitsaromentarijiate, aisa iragavejaque intsavetacomajiaqueriquea Quirishito Jesoshi, aatoquea itsaromitatsi, yaventamajatacaritarite.

**Iroaqueraca yonigaimojiacajica
Aapani Irioshi**

¹⁴Noninque taampina noanaque namenajiajatempi, cotanquitsi notioncantaquempiroca ocatica ¹⁵cameetsanijia aatoguetei nagavejitsi noguitsi taampina, pintaquenijitei quero ancojiaquempani ancomajamajajiaquempaguetei maasano aatimpajia choocatimojiaquerica Aapani Irioshi itsovironaquitequi, maasanotari aatimpajia yashintajiacaca Aapani Irioshi anijatsica, apeanaja quejetaca oova titaqueroca iroomajatatsica, aroguenti ompetanacaroca. ¹⁶Arimajaca caavijia anaaquequea oganejencamajataca maasanopae teeca intsajivetemparoji iroaqueraca yonigaimojiacajica Aapani Irioshi. Irootaquequea ocatica:

Yonigaampoqaca Quirishito icaquintepojaqueguetei.

Ishire Aapani Irioshi yagavejacaqueriquea intsajiquerinijite iriguentei Irijanite, aisa irashivantijitete yamenajiaqueriquea.

Itsavetantimojitaqueri caquinteguetatsica,
itsariventajianacariquea quepatsiquitica.

Yatsomajanaja jenoqui, yaajitavajiri inquitequi.

**Ovashiantajianajeroneca
itsariventajiavecarigueti**

4 ¹Imaica noninque noncamanquempi iriraquea Ishire Aapani Irioshi icanque oncoramanitapojaquegueti arejetapojaquem-pagueti savincaguiteri inchoocagarantajiana-quequea irovashiantajianajero itsariventajia-vecarigueti. Iriguenti iroguijatacojianaque-quea amatavijajiaquerica, aisa iroguenti inquemisantajianaquequea itsatacantica ampatsinipae. ²Iriguenti inquemisantamajajia-quequea cameetsatamampeajiatistica caavijica yamataamajaca, yamemajatanajarotari igovaeguisher aatotari ochagashirentajiri. ³Irirajia quejejiaqueroca imaica icantimentantajiaquequea irimanquigajitemparogueti manquigarentsijia, aisa manquigarentsijia omanquigajiaquemparigueti shirampari. Aisa icantimentantajiaque-quea irishecajitaquemparogueti taaca opajitapae teeca incantimentantavetemparoji Aapani Irioshi, ipeacaaguetacarotari irishecajitaquempari cameetsaniji ashecajiaquemparoniji aatimpajia tsarventajiatistica tsamajajiguiroca iroomajataistica, ancantajia-queri: “Arioteesa.” ⁴Maasanopae ipeacaaguecaca Aapani Irioshi iroguenti cameetsavaeque. Aatoquea icantimentantajitirotsi ashecajiaquemparogueti arigueti ancantajia-queri: “Arioteesa.” ⁵Irootarite cameetsatacaguerone Iguenquetsatsare Aapani Irioshi aisa amanacoventaquerogueti.

**Quero incoquempani Timoteo
irisavicavenquerogueti inintaguetica
Jesoquirishito**

⁶Pintsatacaajiaquerigueti papitsariventarijiate maasanopae ocaticapae,

iramenaquempiquea Jesoquirishito pinetsanamajaquequea ininqueca iriatimpa. Arimpaquea pintsamajatana-quequea Quenquetsatsarentsimajaca piquemisanqueca. ⁷Aatoquea piquemisantajiguiro itsavetashijiacaca caquinte, irooca otsavetashijiavetacaca quenquevarovaejianquitsica. Iroguenti pisavica-ventajiaquequea inintaguetica Aapani Irioshi. ⁸Oraqueate anintajiguiqueti antampishijiaquequea atsinuqui cameetsaveca, cotanquitsiquea caavijica anaaque ocameetsavaeque anquenquejama-queri Aapani Irioshi asavicaventajia-quequea inintaguetica iriatimpa anchoocajiaquenijite cameetsa ocantiqui quepatsiqui aisa ontaniqui jenoqui. ⁹Iroomajacaquea ocatica nocanquem-pica imaica, cameetsavaeque inquemisantamajajiquero. ¹⁰Aatimpajia aventaventaicari Aapani Irioshi anijatsica. Irootaquequea asavicaventantajiacaroca maasanopae inintaguetica, aisa atsipetacovaejiaca taaca opajitapae. Iriatimpa inintavecaquea irimeshijia-querimequea maasano caquintegueta-tistica, cotanquitsiquea iriguenti imeshijia-quequea aventaventaicarica irimeshijia-queriniji.

¹¹Pincantajiaqueriquea maasano tsarventajigarica irinetsanatavaquero ocatica notioncaquem-pica, pintsataca-majaqueriquea. ¹²Pintsavetantimojia-querigueti Iguenquetsatsare Aapani Irioshi inchiqiojijitaja pipeacagatsi covaeguisherentsi, manaquea pincomajama-quepa cameetsaniji iramenajia-quempinijite papitsarventarijiate ariquate inquempejianaquempaquea iriatimpajia. Pimpintsatacojiaquempari pigonoro, pintsarventamajataquempariquea Aapani Irioshi, pincoquem-paja pincomajama-quepa. Pinquem-petaquequea imaica inquemisantama-quepa quempinijite aatonijite icantajigui:

“Arisa icota quenquetsatanquitsica iriaqueraca quenquevaritananquitsica, aatoqueate iquemisantiritsi.”

¹³Oraqueate aatotagueti nocoraquetsitatsi, pisavicaventamajaquerojate pampatsajavanqueroja Iguenquetsatsare Aapani Irioshi picapiocapinijiacagueti pintsavetantaqueroquea, aisa pintsatacaantamajatanajeroja. ¹⁴Pinquenquejeja coramani ipamijiaquempiquea pishinquireguishiqui quempoguijajiguirica tsaromentajiacarica iquenquetsashirentacaajiaquerigueti Aapani Irioshi icantantajiaquempica pisavicaventamajaquero pintsavetantaguiteni, aisa pintsatacaantajiaquequea, iroompaquea ariquea yagavejacaquempiquea Aapani Irioshi. Irooquea imaica pisavicaventamajaque, inchiquiojitaja povashiantanajirotsijate.

¹⁵Noncantsijajempiquea aisa pisavicaventamajatanajerojate iramenajiaquempinijite maasanopicancani pitsatanaquequea. ¹⁶Pincomajamajaquempajate, cameetsaquea pintsatacaantaguiteni, pintampamicamajatero. Pincoquempanija pisavicaventamajaqueroquea. Pinquempetanaquerogeti imaica incoquempani incavintsajamajaquempi Aapani Irioshi. Ariquea inquempejiaquempiquea quemisantaquempineca.

**Quero incoquempani Timoteo
intsatacaajiaquerigueti tsaromentajisica**

5 ¹Aatojate picantomajiritsijate quenquevarivaetatsica, cameetsaja pintsatacaaqueriquea pinquempetacaquempiquea iroca piri. Iriroaquea iriaqueraca quenquevarijananquitsica pinquempetacaajiaquempirija iroca piguentijeguitepae. ²Oraqueate quenquevarovaetatsica pinquempetacaajiaquemparoquea irooca irijanintajiguimpica. Irooquea iroaqueeraca

quenquevarojiananquitsica pinquempetacaajiaquemparoja pitsijoitepae, pincomajaquennequejanequempaja.

³Pimpintsamajajiaquemparoja metojacorojia teeca inchoocateji ojitane.

Iroatimpajia caaviji ocoguitejacovaejiaca. ⁴Cotanquitsiquea choocagueti irijanijiate, orijanijiate, iroca oshaijiate, oshaojiate, intsajiaquequea impintsatacojiaquemparoquea irojocajiaquenerojate ocoguitejacojiacaca, iroorijite coramani iriri, iriniro, ityaine, ityaone yojocajiaqueneriquea iriatimpajia. Inquempejiaquerogeti imaica irishinevaetanaquempaquea Aapani Irioshi, irootaquequea ininqueca iriatimpa.

⁵Oraquea metojacoromajaca coguitejacomajatanquitsica choocatajatsica apaniro, teeca inchoocateji ojitane, manaquea oguijaguitiniquea incavintsajaqueronijite Aapani Irioshi, ocoguitani osavicaventaguitirini amanaguitirini savincaguiteriqui aisa pitsecariqui.

⁶Cotanquitsiquea oraquea metojacorosavicaventiroca taaca opajita oninqueca iroatimpa, manaquea quempetacaqueate metojaque, teetarite ontsaterinica Aapani Irioshi. ⁷Pincamanterijate tsaromentajisica irinetsanatavaquero maasanopae ocativa aatonijite icantimanajitiritsi. ⁸Iriroaquea teeca incavintsajacojigueriji ijitanepae, teeca irojocajiaqueneriquea icoguitejacojiacaca ijitanemajaca, manaquea yovashiantaquero itsaromentavecagueti, caaviji yogaamajaquero yantaguishequeca teeca intsaromentatempiriji Aapani Irioshi.

⁹Oraqueate pitioncacojiguirogueti metojacorojia, iroguentiquea pitioncacojiaquequea quenquevaromajatananquitsica apanirontamajaterica manquigataroca tequeratagueti irimetojeji, teeca omanquigatajempaji itsipa. Oraquea tequeratataca ajagantsitacoteji 60

ajagantsite aatoja pitioncacotirotsijate.
¹⁰Aisa iroguenti pintioncacojiaquequea
 iquemacojitaqueca caaviji opintsamaja-
 tantajia: irooca oquenquevarijiajiri
 irijanijiate onetsanajiajiri, aisa netsana
 aajiavaqueri apitsaromentarijiate
 coraquejianquitsica, irooca aisa
 amijiaqueriquea itsipapae tsaromentajia-
 tsica, irooca aisa ocavintsajacovaequeri
 atsipevaetanquitsica, irooca aisa taaca
 opajitapae cameetsaripae. ¹¹Cotanquitsi-
 quea aatoja pitioncacojiguirotsijate
 metojacorojia tequerataca onquenque-
 varomajateji, iroorijite iroaqueraguete
 oncantajiavequempari Quirishito:
 “Noncoguitempani nosavicaventagui-
 tempini”, cotanquitsiqueate iroompae-
 quea manaquea onintajianaque
 omanquigajiajempaquea ariqueate
 ompeacojianajemparoquea ocantajia-
 veeaca. ¹²Inchiquiojitsitaqueate onquejeta-
 caantajiaquempacea iroatimpajia,
 aatarite onetsanajiguirotsi ocantajia-
 vecaca. ¹³Aisa omperamajianaquempa
 iroguenti osavicaventajianaquequea
 onejantajianaquequea. Aatoquea aparo
 operajigatsi, aisa aajianaqueroquea
 tsojetsipae, oncantaguequequea veaa
 veaa, asereseretantaguetaque, onquen-
 quetsaguishetanaque. ¹⁴Irootaquequea
 nonintantacaca omanquigajiajempaja
 metojacorojia tequeramajaca onquen-
 quevaromajateji, irijanintajiaquempa-
 quea osavicaventajiaqueronijite
 otsovironaquite onetsanajiaqueroquea
 aatonijite taaca opaji ompampiatanta-
 quempacea incantaguishetacajojiaquero-
 quea teeca intsaromentajiguempariji
 Quirishito. ¹⁵Choocatarite oconoagaran-
 tajia metojacorojia opeacojianajaro-
 quea otsaromentajiavecariguete, iriguente
 opitocashitanaja Satanashi oquemisan-
 tajianajiri.

¹⁶Iiraquea tsaromentajia tsica chooca-
 guete ijitane metojacotanquitsica

omanquigare, iintsija impintsacota-
 jemparoja iriatimpajia irojocajiajenero-
 jate ocoguitejacojiacaca. Aatoquea
 icantitsi incavintsajerojate itsipa
 irapitsaromentarite itsipatsipaitacaca
 icapiciopinijigaguete, irioquea cavints-
 jerone, iragavejaqueniji itsipajia
 tsaromentajia tsica incavintsajacojiaquero
 metojacoromajaca teeca onchoocateji
 ojitane.

¹⁷Iiraquea quempoguijamajiguirica
 tsaromentajia tsica cameetsavaeque
 irishineventamajajitaquempari, aisa
 inquemisantamajajitaquerijate.
 Iiraquea savicaventajiaquero ca
 itsavetantajiaquero Iguenquetsatsare
 Aapani Irioshi itsatacaantajiaqueroquea,
 iriomajaca irishineventamajajiquempa.

¹⁸Ocanquetari Itioncacaantaquea
 Aapani Irioshi: “Aatoquea pisavotsovati-
 ritsija caapironcaari pisagorejacaanta-
 quempariguete tirigoqui, cameetsataque
 irishecagarantavaquemparo.” Aisa
 otsipa otioncacoca ocanque: “Iiraquea
 catsiquetatsica irovegajitaqueriquea.”

¹⁹Choocaguete cantanquitsica
 ipeacaaca covaeguisherentsi quempo-
 guijajiguirica tsaromentajia tsica,
 aatoguete ichoocajiguetsi mavite irooca
 3 amenamajatanquitsica, aatoquea
 piquemisantiritsi. ²⁰Cotanquitsiquea
 choocaguete quempoguijajiguirica
 tsaromentajia tsica, aatoguete yovashian-
 tirotsi icovaeguishecaguete, pincantoma-
 jaqueriqueate picapiciopinijiacaguete
 cameetsanijite intsarojianaqueni-
 jonijite igonorjia aatonijite iquempejaritsi
 iriatimpajia.

²¹Ariqueate yamenajiacaji Aapani
 Irioshi, jeri aisa Amajirote Jesoquiri-
 shito, aisa irashivantijitete icoguijia-
 queca, irootaquequea noncantantajia-
 quempacea imaica pintampaticamajatero-
 jate maasanopae ocatica nocantagueta-
 quempacea. Pintsatacaanteguete aisa

pincantomajantegueti pinquejetacaajia-
quempari maasano.

²²Aatoja paguiritsija taampina itsipa
pimpeacaajiaquempariquea quempogui-
jaquerineca tsaromentajatsica aatogueti
iroquetita pamenamajajiguri aatonijite
piquejetacaantatsi aatogueti icomajama-
jata. Aviatimpa arimpaqueate pincoma-
jamajatanaquempaquea.

²³Pojoquijijooquijitagueti ocatsitimpi-
gueti pimotojiaqui, aatoquea aparo
pitsatitsi pimiraroquea oja, pimiragueta-
vajemparoqueate capichajaji vinoja.

²⁴Chooajia iconoagarantajiacaquea
itsajiquero taampina ipeacaajiacarogueti
covaeguisherentsipae ariquea icantoma-
jajitaqueriquea, cotanquitsiquea
iconoagarantajiacaa itsipapae oncorama-
nitapojajegueti intsajiqueroquea
incatsimajiaqueriquea Aapani Irioshi
maasano peacaaguishetacaroca
covaeguisherentsi. ²⁵Ariqueate
iquempejiaca peacaajianquitsica
cameetsaripae iconoagarantajiacaquea
itsajitaquero taaca opaji ipeacaajiacaca.
Itsipapae teequea intsajiteroji, cotanqui-
tsiquea oncoramanitapojajegueti
intsajitaqueroqueate.

6 ¹Irraquea yashintajitacaca
tsaromentatsica inquemisantamaja-
taqueri ashincarica aatojate ipigapiga-
tsataritsijate aatonijite icantaguishetaco-
jitrirtsii Aapani Irioshi, aisa aatonijite
icovaeguishtetacojitirotsi atsatacaantajia-
queca. ²Oraqueate iriguentigueti
ashinquemparine tsaromentatsica
aatoquea icantitsi: “Teequea nontsaroa-
caguempariji, iriguentiquea napitsaro-
ventarite.” Caaviji iranaaque irantimo-
majaqueriquea, yamenaqueriquea
iriguenti icatsiquetimoquequea irapitsa-
roventarite ipintsamajatacaca. Imaica,
irijani, noninque pintsatacanqueroquea
ocatica, pincantajiaqueriquea papitsaro-
ventarijiate irinetsanamajajiaquero.

Quero caaviji anaavaeque maasanopae

³Oraqueate atsatacaantajiaqueca
aatimpajia iroguenti Quenquetsatsaren-
tsimajaca, atsatacaantaquequea
icanqueca Amajirote Jesoquirishito,
atsaromentamajatacariquea Aapani
Irioshi. Cotanquitsiquea choocajiarite
teeca irinintajigueji inquemisantamajaji-
gueriji, iroguenti itsatacaantajiaquequea
teeca irooquea Quenquetsatsarensima-
jaca. ⁴Iriguenti caavijica yaventaco-
vaeca. Teequea intsatimateji. Iroguenti
ishinevenca impigapigajencatantajia-
quempa, irootaquequea opampiatanta-
pojacariquea isemacotsitanta, icatsima-
tacaanti, icantaguishetacotanti, aisa
mana iquenquejashitaca: “Arica chooca
yantaqueca.” ⁵Icatsimatavacaapiniijica
irirajia quenquejajiguero covaeguishe-
rentsi, teetari inquenquejajeroji irooma-
jatatsica, manaquea icomajamampeaca
intati, ijijijavetaca igomajamampeane
iraantajiaquemparome taaca opajitapae.
Pintsiparejitempariquea quejecarica.

⁶Cotanquitsiquea ancomajatimenquem-
parigueti Aapani Irioshi, aatogueti
anintavaque anintavaque, manaquea
ashinevaejianaquempaquea, irooquea
caaviji anaavaeque. ⁷Oraqueate iroaque-
ragueti avoajiguigueti teequea taaca
opaji ashintempaji. Ariquea onquempe-
taquempaquea ametojajiaquegueti
aatoquea taaca opaji aajianajitsi.

⁸Cotanquitsiquea imaicaquea imaica
iroguentigueti choocavetanquitsineca
ashecacia aisa aitsaarejia, ashinevae-
quempaquea. ⁹Irraquea nintajitsica
irajaarantaquempa irantamampeagui-
shequemparo taaca opajitapae incarapi-
otantemparoca irajaararo. Ontiavaeta-
pojempari iguenquejane. Yamenavecaro
cameetsavaeque, oquejetaca imorotashi-
jiritirigueti tomirishiquitica, manaquea
isanareacotanaque yomposapojaca isavi.

Ari iquejejiaca caarica quenquejamajata-tatsi, inintamampeacaro taaca opajitapae, iroompa aapojempagueti irimetojaquegueti impomatsavae-queempa iroaroaitanaque camorecariqui.¹⁰ Arimajaca irinintamajajiterigueti imentaquipae oshimerancantapojem-paro coguisherentsipae. Choocatarite iconoagarantajiaca tsaromentajaveta-tsica, inintamajaqueri imentaquipae, itsegoantanacaca yovashiantanacaro-ca itsaromentavecarigueti, yatsipevae-tantajiacaca.

Paavoro icanqueriquea Timoteo aatoquea yovashiantimatirotsi itsaromentacagueti

¹¹Cotanquitsiquea aviatimpa, yashin-tamajatacaca Aapani Irioshi, aatojate pishineventimatarotsi maasanopae ocatica ishineventajiacaca iriatimpajia, pishiapitsatapanajanteroja. Iroguenti-quea pishineventamajaquempaja pincomajamajaquempajate, pinetsana-majaqueroja inintaguetica Aapani Irioshi, paventamajatanacquemparijate Jesoquirishito, aisa pimpintsatantavae-queempaquee, pantsipetacovaequempaquea, aatoja pipigatantatsijate.

¹²Pinquejetemparija ashimirintatsica, pintampishiventenerija Amajirote. Aatoquea povashiantiritsijate pitsaromentacarigueti arejevaequemparoquea poanaquegueti piguintenitomotajempari-gueti Aapani Irioshi pincoguitempani pinchoocaguiteni, irootaquequea icajemanquempica, irootaquequea coramani picamantantacarica maasano capiocajianquitsica: "Notsarovercari Jesoquirishito."¹³ Ariqueate yamenajia-caji Aapani Irioshi anijacaagueterica maasanopae, aisa yamenajiacaji Jesoquirishito tsavetacotantanquitsica icoacoquerigueti Pontsio Pirato, itampaticamajaquero, teequea incantashitem-paji.¹⁴ Irootaquequea noncantantajia-

quempica imaica pintampaticamajatero-jate nocanquempica, aatoja picantashi-tatiimatarotsija, aatonijite ochoocatitsi taaca opaji incantimenquempica.

Ariquea pinquejetanaqueroja imaica pincoguitempani arejetapojempa incoraquetantajatempaca Amajirote Jesoquirishito.¹⁵ Iroompaquee arejeta-pojajempagueti savincaguiteri incoraquetantajempaca intigarancajeri Aapani Irioshi incoraquetaje ocaniqui quepatsiqui, choocatarite aparo Aapani Irioshi Agavejamajata-tsica, iriguenti Irioshimajaca anaajiaquerica maasano majirontajiat-sica anaaguevetatsica, anaajiaqueriquea maasano anaajencave-tanquitsica.¹⁶ Aparomajaca ichooaque iriatimpa icoguitani ichoocati paesato-niqui tequeratagueti onchoocatimateji, aisa icocani inchoocaguiteni aatoquea imetojimatitsi. Itsirencashimpoquirere-javaequequea icanca, cantavaeque tsiren, teequea inchoocateji agavejan-quitsineca inquempejitaquempari. Teequea inchoocateji caquinte amenimaterineca, aisa aatoquea yagaveji irameneri. Incoquempanijate irishineventamajajitaquemparija incantajiqueriquea caaviji yanaaque yagavejamajati. Ari oncoquempa.

¹⁷Pincantajiaqueriquea ajaarantavae-tatsica ashintamajaguetaroca quepatsi-quitica, aatoja yaventacotatsija, aisa aatoja ishineventajigarojate yashincaca, onteroncaguetanajempatari oncorama-nitapojajegueti. Iriguenti irishineventa-majaquempaja Aapani Irioshi pintsata-cocarica, jocajiacajiroca maasanopae cameetsanijite ashinejiaquempaniji.

¹⁸Aisa pincantajiaqueriquea incavintsa-jacotantajiaque, iramitacotantajiaque, irojocagarantajiaqueneri igonoro.

¹⁹Inquempejiaquerogueti imaica oncora-manitapojajegueti iroaroaitanaquegueti jenoqui, incavintsajamajaqueriquea

Aapani Irioshi iramenacaajiaqueriquea maasanopae yoguijacaquerica, ariquea incoguitempani inchoocajiapojaje, iroguenti anijagantsimajaca.

**Iteroncanajirogueti Paavoro
itioncaquenerica Timoteo**

²⁰Imaica, Timoteo, pinquenqueja-majatavaqueroja Quenquetsatsarensimajaca itsatacaajitaquempica, pintampaticamajateroja, shoshoh picantashitatigarotsijate. Aatojate piquemisantiritsija cantashijiatsica

intati. Iriatimpajia icantajiaveca itsamajati, cotanquitsiquea teequea intsatimateji. Oraqueate itsatacaantajiaqueca teetari onquempetemparoji Quenquetsatsarensimajaca aquemisantajiaqueca aatimpajia. ²¹Choocajitarite iconoagarantajiac a quemisantajiaqueriquea quempejiaqueroca imaica, iroompaquea yovashiantajianajiro Quenquetsatsarensimajaca iquemisantajiavecaca.

Noninque incavintsajamajajiaquempi Amajirote.